


Tico Croes cu su di cuatro publicacion na Merca

ORANJESTAD(AAN) -- Recientemente a ser publica na Merca un buki cu ta hiba e titulo "**The Dutch Caribbean: Prospects for Democracy**".

Ta asina cu e buki a ser edita pa Gordon & Breach di New York cu ta conoci pa su publicacion encuanto estudionan di Caribe.

Un di e autornan di e buki aki ta **Tico Croes**, miembro di Parlamento di e partido AVP. Cu e publicacion aki e autor



Arubano aki ta demostra un biaha mas, su conocimiento profundo di e problematica di paisnan chikito di Caribe y su reconocimiento como experto ariba e tereno aki na Merca, Caribe y Latino America.

Kisas Tico Croes no ta conoci aki na Aruba pa su trabaonan academico y su publicacionnan, pero den Caribe, Latino America y Merca, su publicacionnan ta worde hopi lesa y debati.

Un caracteristico especial di e publicacion di Tico Croes ta e claridad di su analisis, su vision y su capacidad singular pa integra diferente factoman.

Aparte di esaki, e topiconan di su publicacionnan tin semper un relevancia pa tanto academiconan como otronan cu tin interes profesional den e topiconan aki.

E publicacion aki ta e di cuatro publicacion di Tico na Merca. Ta asina cu tambe el a publica na Puerto Rico, Aruba, Antiyas y Hulanda.

E topico di e articulo di cual Tico Croes ta co-autor ta trata e **problematica di descolonisacion y su relevancia pa Aruba y Antiyas**.

Despues di a repasa e motibonan tras di aruba su deseo pa haya Status Aparte y e realisacion di esaki, ta analisa e concepto di autodeterminacion y e violacion di e principio aki door di Hulanda door di impone independencia na 1996.

E cuatro opcionnan y e dilema di independencia pa paisnan chikito ta worde analisa den e cuadro di e desaroyonan geopolitico tanto riba nivel mundial como regional.

Den esaki e vulnerabilidad di paisnan chikito ta resalta como e factor cu por determina cualkier escogencia di un pueblo ariba tereno di estructura estatal.

Loke ta resalta den e articulo ta e proposicionnan concreto di un maneho tanto ariba tereno nacional como internacional cu ta cuadra cu loke den ultimo añanan nos a mira Tico ariba tereno politico.

Den un combersacion cu Tico Croes el a expresa cu e topico di **vulnerabilidad** aki tin special atencion awor aki debi na e situacion cu ta reinando na Trinidad na e momentonan aki ora un grupo di rebeldenan a intenta pa tumba Gobierno di Trinidad.